

Inatsisartut suleriaasianni §33 naapertorlugu aalajangiiffigisassatut siunnersuut Naalakkersuisut matumuuna saqqummiuppaat:

Meeqqat pisinnaatitaaffii pillugit isumaqatigiissummut saaffiginnittariaaseq pillugu 19. december 2011-meersumut Kalaallit Nunaata nammineq qinikkaminik isumaqatigiissutit tapiliusaanut 20. november 1989-meersumut peqataalernissaanik Inatsisartut aalajangiiffigisassatut siunnersuut.

(Meeqqanut, Inuusuttunut Ilaqutariinnullu Naalakkersuisoq)

Tunngavilersuineq

Naalakkersuisut Meeqqat pisinnaatitaaffii pillugit Naalagaaffiit Peqatigiit isumaqatigiissutaata malinneqarnissaanut 2023-2030 iliuusissatut pilersaarutaanni aalajangiussassatut siunnersuut suliniutitut ilaavoq.

Kinaassusersiornani isumaqatigiissummut tapiliussaq inunnut ataasiakkaanut imaluunniit inuit eqimattanngorlutik Meeqqap pisinnaatitaaffii pillugit Naalagaaffiit Peqatigiit Ataatsimiitsitaliaannut isumaqatigiissummik kannguttaatsuliorfigineqarneranik nammagittaalliorsinnaalersitsilissaaq aamma Meeqqat Pisinnaatitaaffii pillugit Naalagaaffiit Peqatigiit Ataatsimiitsitaliaat nammineq sakkortuumik imaluunniit aqqissuussaasumik isumaqatigiissummik kannguttaatsuliorfiginneratarsinnaanernik misissuisinnaaneranik periarfissiissaaq.

Isumaqatigiissummi pisinnaatitaaffiit ilaasut tamaasa pillugit naammagittaalliornermut ilaapput. Ataatsimiititaliap piviusorsiorluni naammagittaalliummik suliaqarnissaanut naammagittaalliornermi arlalinnik piumasaqaatinik naammassisassanik peqarpoq, matumani naammagittaalliuut ersittumik tunngavissaqanngitsooqqusaanngilaq imaluunniit naammaginangitsumik paasissutissartaqassanngilaq aamma nunami eqqartuussivitsigut atugassarititaasut tamarmik aqqusaarneqareersimassapput. Naammagittaalliuut ataatsimiititaliamit piviusorsiorluni suliarineqassappat, naammagittaalliornermi suliaq ataatsimiititaliamit oqaaseqaammik naggaserneqassaaq, tassanilu Kalaallit Nunaani Namminersorlutik Oqartussat nalunaarfigineqassapput aamma naammagittaalliortoq siunnersuutaaratarsinanasunik innersuussutinillu nalunaarfigineqassalluni.

Eqqartuussivilersuussineq matumani pineqanngilaq. Isumaqatigiissutit qanoq paasineqarnissaanik imaluunniit sulianik aalajangersimasunik aalajangiinissaaq ataatsimiititalip pituttuisumik sunniuteqarfigisinnaanngilai. Ataatsimiititaliap piginnaatitaaffiisa killingi tassaapput inuit ataasiakkaat naammagittaalliuttaannik siunnersuutinik innersuussutinillu saqqummiussinerit. Ataatsimiititalip inuit ataasiakkaat naammagittaalliutaannik suliaqarnermi nalaani iliuuserineqarallartussanik innersuussuteqarsinnaavoq.

Naalakkersuisut missingiummut oqaaseqaataat

Meeqqat pisinnaatitaaffii pillugit isumaqatigiissut Inatsisartut 1993-imi peqataaffigilerpaat taamanimiilli isumaqatigiissut siuarsarneqalerpoq, soorlu ilaatigut Meeqqat tapersersorneqarnissaannut Inatsisartut inatsisaat eqqaaneqarsinnaavoq.

Pisinnaatitaaffiit aallaavigalugit suliffeqarfiiit arlallit, soorlu Meeqqat pillugit Oqaaseqartartoq meeqqat pisinnaatitaafiinik pitsanngorsaaqqinnissaaq anguniarlugu Kalaallit Nunaata

isumaqatigiissummut kinaassusersiornani tapiliussamik atuutilersitsinissaanik inassuteqartarput.

Kinaassusersiornani tapiliussaq kingulleq Meeqqat pisinnaatitaaffii pillugit Naalagaaffiit Peqatigiit isumaqatigiissutaata malinneqarnissaanut 2023-2030 Naalakkersuisut iliuusissatut pilersaarusiaannut ilanngunneqarluni atulersinneqarnikuuvoq.

Pisortanut aningaasaqarnikkut allaffissornikkullu sunniutissat

Meeqqat Pisinnaatitaaffii pillugit Naalagaaffiit Peqatigiit Ataatsimiititaliaannit suliat nammagittaalliutaasut ataasiakkaat akineqartussatut saaffiginnissutit pisortanut allaffissornikkut suunngitsumik kinguneqartitsissutaasinnaapput.

Namminersorlutik inuussutissarsiortunut aningaasaqarnikkut allaffissornikkullu kingunissai

Namminersorlutik inuussutissarsiortunut aningaasaqarnikkut allaffissornikkullu kinguneqassanngilaq.

Innuttaasunut aningaasaqarnikkut allaffissornikkullu kingunissai

Meeqqat tapersersorneqarnissaminnik pisariaqartitsisut naammagittaalliornissaminnut periarfissaqarnerulissapput, tassami kinaassusersiornani isumaqatigiissutip tapiliusnaanik pilersitsineq inunnut ataasiakkaanut imaluunniit inuit ataasiakkaat eqimattanngorlutik Meeqqat Pisinnaatitaaffii pillugit Naalagaaffiit Peqatigiit Ataatsimiititaliaanut isumaqatigiissutip kanngutsaalliorfigineqarneragaallutik naammagittaalliorsinnaanerinek pilersitsissaaq.

Tusarniaaneq

Siunnersuut suliffeqarfiup iluani Peqqissutsimut Inunnullu Innarluutilinnut Naalakkersuisoqarfimmut, Isumaginninnermut, Suliffeqarnermut Nunamullu Namminermut Naalakkersuisoqarfimmut, Atuisoqarnermut Unammilleqatigiinnermullu Aqutsisoqarfimmut (Isumaginninnermi Naammagittaalliuuteqarfik pillugu), Aningaasaqarnermut Akileraartarnermullu Naalakkersuisoqarfimmut, Inuussutissarsiortnermut, Aatsitassanut, Nukissiutitut, Inatsisit Atuutsinneqarnerannut Naligiissitaanermullu Naalakkersuisoqarfimmut, Nunanut Allanut Ilisimatusarnermullu Naalakkersuisoqarfimmut, Ilinniartitaanermut, Kulturimut, Timersornermut Ilageeqarnermullu Naalakkersuisoqarfimmut aamma Ineqarnermut, Attaveqaasersuutinullu Naalakkersuisoqarfimmut tusarniutitut nassiunneqarnikuuvoq.

Ilanngussat

1. Meeqqat pisinnaatitaaffii pillugit isumaqatigiissummut kinaassusersiornani tapiliussaq 20. november 1989-meersoq
2. Meeqqat pisinnaatitaaffii pillugit isumaqatigiissummut 20. november 1989-meersumut Meeqqat Pisinnaatitaaffii pillugit isumaqatigiisummik Naalagaaffiit Peqatigiit Kalaallit Nunaata malinnilluni kinaassusersiornanilu tapiliussaa 19. december 2011-meersoq pillugu allakkiaq